

東  
華  
續  
錄

東華續錄

乾隆二十四

臣王先謙敬編

臣周潤蕃恭校

秋七月丙申諭直隸總督那蘇圖兩廣總督策楞江蘇巡撫陳大受福建巡撫周學健簡任封疆歷有年所實心宣力甚屬可嘉那蘇圖策楞著加太子少傅陳大受周學健著加太子少保以示優眷○己酉諭軍機大臣等朝鮮國王李吟奏稱臣聞今於鳳凰城邊外開墾莽牛哨地方設兵屯田信如臣所聞墾田設兵耕種則中間界河不能禁人往來竟成通衢將禁之難周戒之弗從臣國邊疆獲罪者自此始矣臣國上下人民不勝惶懼之至臣不得不據情陳奏等語見已交部議俟具奏時酌降諭旨觀該國王所奏蓋以其境內之人素有乘閒偷越窆濫者若設兵巡察則伊等不

得任意往來所奏亦屬卑鄙小國之人不識大體惟知縱下謀利不思甯定邊疆而故謂難行以試我亦未可知再伊疏內有從前鳳凰城立界時曾留沿江曠地百餘里等語此蓋恐我於原留空地駐兵屯田逼近彼疆耳此等情節達爾黨阿於從前具奏時並未聲明殊屬錯謬且去年熊岳副都統鄂齊爾欲帶兵出鳳凰城行圍經守邊章京等以與朝鮮國止隔一江所關重大未許其行達爾黨阿亦曾將此事奏聞今此二處惟莽牛哨應行巡察遣副都統什勒們親往察看據稱中江東北哨二十里江中有一洲其北支水一曲卽莽牛哨地方江中有石一條卽係與朝鮮國分界處見在添撥官兵巡防皆在吾界內每年三月間遣舟師四名巡察於冰釋後撥二舟往守莽牛哨要隘其二舟輪流巡察所有官兵俱不許踰江中界若彼此各加嚴禁不至相通等語著仍照原

議行勿從其請其鳳凰城邊疆向外餘地開墾耕種一事著照所請行再達爾黨阿前奏請巡察莽牛哨時部議另詢之朝鮮國王再行定擬經朕批改准行今朝鮮所奏若此則於彼國必有所不便且雍正九年那蘇圖曾奏此事因朝鮮諄懇故未果行迄今十餘年並無他故其巡察此處於我邊境有無裨益或於伊國實有妨礙之處著再行詳查俟文移往來得其情形辦理亦易此次達爾黨阿若親往巡察誠恐聲張致啓疑端著不必去再令副都統什勒們前往確察達爾黨阿亦當留心務將察看情形據實奏聞不可迴護已往將此寄諭將軍達爾黨阿嚴飭邊界官兵加意防察儻伊屬下人等妄滋事端達爾黨阿卽便宜行事一面奏聞一面酌辦不可姑息亦不可輕率無論有事無事惟以防守邊疆爲務○命洪澤湖增設救生壩四○皇八子永璇生○庚戌諭

戶部尙書海望見在出差侍郎三和傅恆兼管內務府事三人又俱圓明園行走不能時常到部辦事戶部不可無坐辦之堂官著將吏部侍郎雅爾圖調補戶部侍郎其吏部侍郎缺著將德齡調補三和熟悉工程著卽補工部侍郎則兩部得人矣○軍機大臣議覆福建巡撫周學健奏福安縣潛住夷人以天主教招致男婦二千餘人書役等俱被蠱惑請從嚴治罪等語查天主教係西洋本國之教與燃燈大乘等教有閒遽繩以法似於綏遠之義未協應令該撫將見獲夷人槩送澳門勒限搭船回國從教男婦擇情罪重大不可化誨者按律究擬若無知被誘量予責釋毋致滋擾從之○甲寅兵部議奏朝鮮國王李吟奏近聞熊岳副都統來中江查閱邊界欲於莽牛哨添設屯兵鳳凰城展柵開墾伏念鳳凰城柵外曠地百餘里禁人居住以免涸雜今若墾土設屯則衣帶

之水不足以限往來之路易於相通查康熙五十四年上國民人等有在土門江岸結屋居住者蒙 聖祖仁皇帝撤毀雍正九年章瓊河匯流欲設卡防守蒙 世宗憲皇帝停罷乾隆二年內地商民議與中江交市又蒙 皇上諭令中止今副都統來查之地卽雍正九年停罷防汛之所而今此設屯墾土之事比土門中江等事輕重相懸仰懇降旨停罷等語查奉天將軍達爾黨阿原議於莽牛哨添設官兵原因該處係內地邊界應駐官兵彈壓復經查明江心有石嶼一道與朝鮮東西分界所議駐兵處與該國界址尙隔巨浸卽開展邊界墾闢地畝亦係內地不至雜擾且原議兵船於西岸停泊不許擅侵東界惟期查拏奸匪以爲久遠安全之計則設汛之議不特邊境肅清於外藩亦大有裨益應將該國王所奏均無庸議得旨莽牛哨添設官兵巡查一案前據部議應

再令該將軍悉心妥酌續據達爾黨阿奏稱令熊岳副都統什勒們親往查看設汛之處與朝鮮實不相通無慮涸雜滋擾且於內外俱屬有益經部覆准朕已允行茲該國王陳奏前來以墾土設屯於伊國未便朕又敕交部議該部以無庸議覆奏朕思我朝加恩朝鮮從來優渥今莽牛哨添設官兵巡查一事既經什勒們查明與該國界址無慮涸雜滋擾且於內外俱屬有益而該國王又陳奏其不便情詞懇切究未知該地實在情形如何著兵部尙書班第馳驛前往同什勒們將彼地情形詳加察勘如果設汛之處係中國界內與彼國毫不相涉則設兵置汛以杜奸宄所以肅清邊防自屬應行之事卽該國王懇請亦不便准行若其地界或有犬牙相錯難免涸淆之處亦卽據實奏聞候朕另降諭旨至從前議准達爾黨阿所奏展邊墾土一案該國王旣稱鳳凰城樹柵之

外向留空地百餘里務使內外隔截以免人煙輳集溷雜滋事之患此奏尙屬可行著將鳳凰城展柵之處照該國王所請停止並令該部傳諭該國王知之○丁巳諭朝鮮國王李吟奏請停止鳳凰城邊外墾田莽牛哨地方添設巡察兵丁表內援引康熙五十四年奏請拆毀土門江岸所建廬舍禁止種田蒙 聖祖仁皇帝恩准雍正九年奏請停止莽牛哨地方設立卡座蒙 世宗憲皇帝恩准乾隆二年請罷中江互市亦蒙朕恩准各情節歷查舊案實係皆俯准所請行可知我欲舉行之事因伊奏請俱已停止此固懷柔小邦之意但屢以難行之事俯准所請輒爲停止於國家體制亦有不合轉爲輕視曷若不舉行之爲愈也此等情節著曉諭達爾黨阿凡事俱遵照舊制辦理似此有名無實礙難辦理之事著勿舉行後任將軍大臣不知復恐有欲如是辦理者著存記



該處檔案以便永遠遵行○辛酉諭御史戴章甫奏請續修吏部見行則例以備章程俾法制周詳按冊可考等語朕思爲政之要貴於端木本旣立則總持大綱使萬目無不條貫自免叢脞之患此臨下以簡正諸務之所由就理非屏棄一切之謂也夫經理庶政整飭官常自不得不立定章程定章程乃所以昭法守書曰其爾典常作之師欲其遵守而無事紛更也國家所定法制皆盡善盡美原極純備因簿書日繁其事偶有一二難於畫一者不得已而稍爲變通不過隨時酌辦因事加詳豈能遠勝於前卽斟酌妥協亦不出前人範圍之內若必欲每事立一成規無論勢難舉備而條分縷析屢易屢增實亦無此政體晉杜預云簡書愈繁官方愈僞不揣其本而齊其末其失滋多且條件繁瑣則官司不能記憶考覈難以徧及以類相溷不知何所適從而書吏之緣以爲奸

者匿其正條出近似者以逞其欺蔽尤易於上下其手其弊可勝舉乎又據稱刑部則例館會奏明三年一次纂輯今吏部則例積至五年似宜先行纂輯等語刑部爲讞決之司動關民命其條例擬議之處較別部爲多但見在律例皆再三詳定以期協中亦不宜輕於損益從前所定三年朕意亦謂太速嗣後刑部似應限以五年至於吏部等部則例卽限以十年亦不爲遲著大學士會同九卿將如何分年纂輯之處定議具奏○癸亥命江蘇截漕糧二十萬石備賑○黃淮二水盛漲命河臣妥籌善後機宜

八月乙丑免江蘇賦外雜辦銀兩○辛未諭朕覽御史周禮奏請將戶部侍郎李元亮開缺守制一摺所奏似是而非且有意以行其私國家用人其權斷不可下移或倣照定例或偶爾變通朕心自有權衡總期得人任事耳豈臣下所可意爲進退者如果所用

之人或有不當所行之政或有闕失言官自當陳奏以盡繩愆糾謬之責豈可於用人大事懷挾私心借守禮之名以阻撓國政乎且守禮之議明朝爲甚竟成門戶操戈相向試問於彼時政務會有何裨益乎是以雍正年間聞有令諸臣在任守制者而亦絕無守禮之議此正政治清明下無浮議之善驗也止以外任官員多有鑽營督撫保題之弊幾至習爲故常朕是以降旨停止其必不可少之人無能相代者仍准保題覈奪卽外任大員有丁憂者亦令回京守制或在內用爲卿貳或外缺又復需人仍令前往署理其在外必需之有司官員斷難更易者經督撫題請不令回籍閒亦允從此皆因地因人於禮制之中稍爲權宜並未於滿漢而有所區別也乃周禮奏稱李元亮雖屬旗員究不與滿洲並論不知漢軍百年以來與滿洲無異卽有事故亦皆遵百日成服之例過

期卽照舊任事李元亮見爲都統例不開缺豈伊可爲都統而侍郎反不可乎周禮之意不過以爲復占漢人一缺耳又奏稱何必與前旨相違以致聖謨洋洋頓成反汗等語朕前旨內原有無人相代仍准保題之例今春令大學士尙書侍郎內保舉能勝侍郎之員而所舉率多不能勝任經朕召見一一指出面加申飭周禮獨不聞知而爲此奏亦何憤憤至於此極目前應補侍郎之人朕再三籌度或曾經擢用知其不能勝任者或新進未久難以遽加升遷者是以仍留李元亮與旗例相符卽從前韓光基亦係如此蓋因得人之難周禮如何輕言天下事而遽以不忠代職無人喋喋陳奏乎此必有師生親舊覬覦此缺授意爲之者且借朕所頒諭旨以博敢言之名而行其假公濟私之實朕何如主豈伊狡猾伎倆所能搖奪乎前明言官各立門戶互相排擊矢口譏訕以致

涵清國是釀成尾大不掉之患近來御史各逞胸臆非借以沽譽卽意在徇私如此等非所應言之事而亦肆其簧鼓大有關於政務此風斷不可長周禮著嚴飭行並曉諭科道等官共知之○辛巳以徐以升爲直隸按察使

山西翼甯道遷

○癸未

上御經筵○甲

申諭康熙二十年七月我 聖祖仁皇帝駐蹕瀛臺特召大學士以下各部院衙門官員賜宴命內大臣傳諭慰勞賞賚有差至今稱爲盛事朕臨御以來仰賴 上天眷佑海宇乂安今歲京師雨暘應候百穀蕃昌畿輔共獲有秋各省亦多收穫 天庥滋至我君臣應額手慶成今當秋風薦爽景物咸和念茲宗藩瓜瓞誼屬本支大小臣工宣猷效力宜循往典錫之宴享以昭君臣一體之意叶笙簧酒醴之歡著於瀛臺設宴本月二十七日宴王公及近支宗親二十八日宴大學士九卿京堂翰詹科道載考古昔君臣

有賞花釣魚宴飲賦詩之事諸臣內或文學侍從或翰墨素嫻者  
著入宴賦詩以效賡應喜起之風焉○戊子免江南海州及沭陽  
等州縣民竈積欠○已丑盛京刑部侍郎托時以老病乞休允之  
○庚寅 上幸瀛臺賜王公宗室等宴易殿名崇雅爲惇敘賦柏  
梁體詩王公宗室咸請 上御製分賜列名序曰乾隆丙寅秋八  
月式宴王公宗室於瀛臺之惇敘殿法 皇祖也惟時朕諸叔父  
列王爵者四人皇弟封王者二人皇子三人宗室王公有爵者三  
十二人念我羣從子姪孫姓之同出自 皇祖者或俟封或爵不  
至與宴之列十年以來未舉和會之典親親之誼疏焉則亦命入  
今日之座凡六十有二人其以事故是日未至者復五十餘人於  
戲自黃虞以來有大德之得其位得其祿得其名壽如我 皇祖  
者其誰耶卽子孫之繁衍雖文王不得尙之使目前之振振揖揖

我 皇祖 皇考式臨式憑予與諸弟兄子姪孫姓稱觴獻壽於  
其間其愉悅鼓舞又當何如歡極而戚固情之所必至也然今日  
之宴會我 皇祖 皇考實式臨之實式憑之諸伯叔父自當以  
予言爲不謬也則又灑然以怡焉昔漢武帝柏梁之宴同姓者惟  
梁王武及宗正安國而已其餘皆羣臣然尙以此留詩唐明皇改  
集仙殿爲集賢館俊之義尙矣而周親未與亦闕典也朕今易崇  
雅爲惇敘以紀今日之事復倡爲首句以俟衆作之成凡今茲之  
揆藻得句者皆我 皇祖 皇考遺教之所垂也又何必舉金谷  
之例乎 上倡首句曰筵開惇敘欣同堂康親王巴爾圖以次賡  
續成章 上複製七言律詩三章詩曰露色煙光靄禁垣昌辰嘉  
宴會親藩穀登萬寶真成瑞菊先重陽已泛樽拂檻龍蔥木有本  
拍隄汪濊水宗源何須禮數拘酬酢同是 神堯膝上孫雁齒紅

橋玉影明壺天縱目儼蓬瀛拂招林牖風光美負帶煙霞景物清  
笑語從容伯兮叔獻酬交錯弟於兄一堂敦睦家人吉卻陋山河  
帶礪盟綺疏晴旭麗瞳矐樂事天倫和氣融徐進雕盤瓜有腴繁  
滋釦砌樹連叢情舒共許飛吟管興洽偏思駐漏簫行葦歌成欣  
旣醉高秋樓閣靄春風命王公宗室賡和宴畢賞賚有差○辛卯

上御瀛臺賜大學士九卿翰詹科道等宴宣示七言律詩四章

詩曰起陂鴈侶接鳴珂霽宇空澂氣色和共喜向筵開早菊多緣  
紀歲得嘉禾柏梁臺畔騰牋集仙萼亭邊載筆過緬想虞廷傳盛  
事屢言何以繼賡歌鏡中樓閣五雲稠皎日揚輝素景浮湛露詩  
成天酒下萼蕭樂作徵招流曲江早獻千秋鑑梁國還登太液舟  
三世方明陪御賞從教佳話冠螭頭璇霄猶覩曉蟾娟濟濟冠裳  
擁慶煙丹粟香中陳桂醕玉山頽處酌瓊筵崇牙徐聽鈞天奏高



閭遙聞畫漏傳此日含毫多沈宋昆明漫數景龍年龍蔥雞樹翠  
華留相悅君臣共唱酬亭上宴開惟卜畫樓前醑賜正登秋在陰  
鳴鶴方靡爵樂藻遊魚不避鉤試問彬彬玉堂客瀛臺然否卽瀛  
洲命羣臣廣和宴畢賞賚有差○壬辰諭據福建提督武進陞摺  
奏汀州府上杭縣因蠲免錢糧鄉民欲將所納業戶田租四六均  
分有土棍羅日光羅日照等聚眾械毆業主及至地方官弁撥差  
兵役拘搯復敢聚眾拒捕等語朕普免天下錢糧原期損上益下  
與民休息至佃戶應交業主田租惟令地方官勸諭有田之家聽  
其酌減以敦任恤之誼初未嘗限以分數使之寬減卽如朕之蠲  
租賜復出自特恩非民間所能自主佃戶之與業主其減與不減  
應聽業主酌量卽功令亦難繩以定程也豈有任佃戶自減額數  
抗不交租之理且輕徭薄賦原以培養善良使之常享樂利庶習

尙日漸滄龐若莠民頑梗不馴轉恃上恩以逞其兇惡此乃國法之所難宥斷不可稍存寬縱者從前御史等條奏民風漸驕不宜任其日熾朕尙以此言爲太過今閩省刁民聚黨抗拒而近日高斌亦奏報江南宿遷奸徒欲報全災希圖普賑挾制罷市一事可知民氣日驕洵屬不誣朕乃蹈所謂莫知其子之惡矣羅日光等借減租起釁逞兇不法此風斷不可長著嚴拏從重究處以儆刁頑毋得疏縱至於各省民情固不無愚悍之處亦緣各督撫謂朕保赤惠鮮止知奉行德意遂不覺漸流爲姑息不知父母無不愛之子而於子之賢者自必恩勤撫育若不肖之子又須重加懲創豈容任其驕縱以長奸惡應令各該督撫統率地方有司留心化導在淳良者自應勤於撫字如不逞之徒必有以戢其桀驁之氣則旌淑別慝而稂莠悉除風俗自可轉移是父母斯民者之責也

並令各該督撫遵奉此旨通行出示曉諭知之○癸巳諭從前奉  
天將軍達爾黨阿具奏鳳凰城邊外莽牛哨設汛一案經部議覆  
准行續據朝鮮國王李昉奏稱與伊國不便朕降旨命尙書班第  
前往查勘今據班第奏稱查勘得彼地在我國界內與朝鮮國無  
涉雖與該國人等共涉一江若彼此不准越界各自約束所屬人  
等則不致滋擾永靖邊疆於伊國亦不無裨益此汛理宜安設等  
語由此觀之欲設汛之處在原定界址以內與朝鮮國邊界無涉  
矣唯是該國王世戴國恩甚屬恭順若安設此汛彼國之無知小  
民儻有違禁者伊恐獲罪是以奏請其安設此汛處雖有江灘分  
界兩岸不過一二里之遙相隔甚近如伊屬下人等不能遵奉該  
國王禁令以致該國王得罪朕心有所不忍著照該國王所請莽  
牛哨地方添設汛兵之處停止令該國王將伊所屬人等嚴加約

東至於查拏內地偷越之人並應行呈報之處仍照原議實力奉行不必交部再議該部卽傳諭該國王知之

九月乙未飭宗室命名不得僭用內廷擬定字○丁酉命安徽山東各截漕糧十萬石備賑○戊戌諭致治興化必本於誠凡爲大臣者能事事克殫其實則易俗移風自駸駸於上理朕常以實心實政訓諭臣工而諸臣仍多尙虛浮少實際內猶較可外則尤甚朕亦自愧率先之未能也卽如督撫爲全省表率凡文武官弁皆奉其指示若惟事虛文則屬員相率效尤其於國計民生有何裨益朕看近來督撫其心思智慮多用於簿書考成其實在政事所以仰答乎上而敷布於下者往往不以爲要務不過沿襲舊文爲粉飾潤色之具而已如川陝總督慶復薦舉遊擊馮天錫本內所開事實有朔望宣講 聖諭廣訓開導士卒咸知大義守法奉公

等語夫國家整理戎政以將略材武爲尙必能訓練技勇和輯兵民始可登之薦牘以儲干城之選若以武途出身之馮天錫而謂其能講明文義闡發萬言之精蘊其誰欺乎此不過向來薦本中套語填寫成文然慶復則不應亦如是也又如廣西巡撫鄂昌乃大學士鄂爾泰之親姪竟於請祀名宦疏內稱爲甫申周召稷契夔龍服教畏威行所無事等語在大學士鄂爾泰爲宣力之大臣朕加恩令入祀京師之賢良祠並伊久任之雲南亦已展祀酬庸之典已備可以傳之不朽矣至於廣西一省有之不足加榮無之亦不爲缺而論其實則鄂爾泰當日本係雲貴總督後暫兼粵西者不過一時彈壓苗疆豈必有殊勳惠績淪浹人心足以媲美召棠遠軼卬雨也而鄂昌本內稱頌之詞有古賢臣所不克當而非聖人不能者若鄂爾泰有知必以爲溢美而不安於心料此亦不

出於鄂昌之筆皆伊之屬員欲結歡於上司竭力稱揚不知其立  
言之過鄂昌卽據以入告亦謂此係本章自然照常批發未必經  
朕全覽耳不知朕日理萬幾於諸臣章奏及一切庶務無一事不  
經心亦無一字不過目豈有絲綸重務而偶一疏忽者乎鄂昌係  
加恩復用之人宜事事勉力而亦視進奏本章爲奉行故事卽此  
可見各督撫中似此存心者不少是平日之董率屬吏訓迪閭閻  
此以虛求彼以虛應又安望其去僞以存誠化民而善俗乎是以  
福建上杭刁佃因蠲免正賦自定田租與業主四六均分抗不交  
納遂敢聚眾拒捕而江南宿遷奸徒開賑挾制罷市習俗浮囂民  
風驕肆地方官平素不能化導可知此皆由虛飾成習未嘗以至  
誠感人所致也朕因見諸臣多蹈此習指其一二當知自愧繼自  
今其各崇實黜浮俾誠心相浹而吏治民風進而日上是所望於

督撫諸臣也○己亥命高斌往奉天疏濬河道○設綏遠城滿漢

官學○以介福為盛京刑部侍郎由內閣學士遷○庚子諭大學士張廷

玉見今在京總理事務朕念其年逾古稀若照例直宿未免過勞

著日間進內辦事不必直宿○命劉統勳顧琮各回原任以周學

健為江南河道總督調陳大受為福建巡撫以安甯署江蘇巡撫

調王師為江蘇布政使以唐綏祖為浙江布政使由山東按察使遷○辛

丑定欽差大臣查閱各省營伍例兵部奏查閱各省營伍其地方

臣一員勢難周徧甘肅地處邊省安西提標設驛塞外若止簡派大

大臣一併巡查則幅員廣遠亦難徧歷請自乾隆丁卯年為始查

閱直隸山西陝西甘肅四川等五省直隸山西差派一員陝西四

川一員甘肅一員陝西一員戊辰年查閱湖北湖南雲南貴州等四省兩

差派一員雲貴一員己巳年查閱廣東廣西浙江福建等四省兩

廣東派一員閩浙一員庚午年查閱山東河南浙江江西等四省

山東河南差派一員江南江西差派一員○壬寅以赫赫為山東按察

使由甘肅洮岷道遷

○癸卯

上奉

皇太后啟鑾謁

泰陵並西巡五

臺山○丁未 上奉 皇太后謁 泰陵○減直隸山西軍流以

下罪○己酉大學士伯張廷玉等奏覆編修楊述會所進經史講

義內稱科舉之弊自不可聽其日下而制義之行已四百餘年今

何能驟爲更張亦惟酌復舊式稍爲變通臣等查設科取士近代

試以文藝原非專尙詞華至考試之法漢唐以來明經賢良進士

諸科初或得人後適滋弊欲異其經至於申韓老莊皆以發問而

鈔襲條誦舊策其習不改蓋制愈更而趨時好者應之速法方變

而爭捷徑者術彌工蘇軾所謂有知人之才雖因今之法而有餘

無知人之才雖復古之制而不足誠篤論也今科場取士試以經

書制義論表判策求其各體皆合程式卽老生宿儒不能出其範

圍若惟節鈔剽盜卽朝更夕改其術自在從前條奏更制者甚多

康熙五六年間曾廢八股而試策論行之一科風氣卑靡尤甚百



餘年來仍復舊制亦以取士之法如是已足今楊述會所稱制義舊制限三百字以上篇末自抒所見名曰大結限二百字以下後因文日加長大結遂廢今復限四百字以上許用大結限二百字以上等語查科場條例初場文每篇不得過五百字原有定制明初多用大結非因文長而廢蓋大結之體漢唐以下之事隨題綴入明之中葉每以此爲關節其後悉行禁止若仍用大結弊實愈多斷不可行又稱舊制考試經題不嫌隱僻然書義亦用大結先引注疏再引宋儒注解等語查考試經義原聽主司命題無專尙冠冕禁止隱僻之例如限定隱僻則又於隱僻中揣摩弊亦相等至宋儒注解精者固足以發經蘊若駁雜之說添設大結之中有傷正旨無補經文又稱表題不論古今隨時互出五判易以五言排律八韻等語查表以標著事緒全在辭旨明暢聲律精切若果

學富詞充卽詩才賦手皆已兼之如隨俗備擬勉強湊成無論古今皆可率應仍不免雷同至五判原欲士子留心律文俾引經議制詳慎刑章若易以律詩則風雲月露之詞不免爲李鄂所譏且僅僅五言數韻尤易湊合更難以杜勦襲又稱策題發問太多對者不悉往往敷衍草率嗣後五問限以一經一史一性理二時務等語查科場定例五策題字原不許過多其發問不拘門類天文地理禮樂兵農經史子集等類隨時策試正欲其貫通古今指陳得失如但限以一經一史一性理二時務示以定格更易揣摩且頭場已試經義二場試性理論三場復重見疊出亦不足以窮摩擬在楊述曾以爲科舉之學欲其難不欲其易臣等竊謂若求其實則今之試法不見爲易若不求其實卽如所奏更不見其難且恐弊端復從此起惟在司柄者精心衡鑒實意旁求果能不爲淺

學眯目則甄拔皆佳士不在更張舊制也從之○丙辰 上奉

皇太后駐蹕五臺山○免山西五臺縣明年額賦十分之三○丁

巳召馬爾泰來京以喀爾吉善爲閩浙總督調塞楞額爲山東巡

撫陳宏謀爲江西巡撫以徐杞爲陝西巡撫岳濬爲湖南布政使

永甯爲廣東按察使○戊午減浙江温州衛屯田額餉○己未以

江南水災命開捐例賑濟○庚申 上奉 皇太后自五臺山回

鑾○壬戌召鄂彌達來京以塞楞額爲湖廣總督阿里衮爲山東

巡撫愛必達爲山西巡撫孫紹武爲貴州布政使恆文爲貴州按

察使

由直隸通  
永道遷

冬十月乙丑調永甯爲直隸按察使徐以升爲廣東按察使○丁

卯 上至正定府閱滹沱河隄工○免廣西桂林等七府州官租

學租十分之三○禮部議駁福建巡撫周學健奏閩省侯官縣屬

天甯山下臨大江是爲龍潭志載唐廣德中有龍從地出遇旱祈  
禱輒應臣莅任後地方苦旱屢次親禱俱霽甘霖但棟宇未立祀  
典無聞見買田建廟請動項興建並請照雲南鹽井龍王之例加  
以封號春秋二祭等語查祭法云山林川谷邱陵能出雲爲風雨  
見怪物皆曰神又云日月星辰民所瞻仰也山林川谷邱陵民所  
取財用也非此族也不在祀典是所謂能出雲爲風雨見怪物者  
卽指山林川谷邱陵之神非指所見之怪物以爲神而祀之今該  
撫所奏侯官縣龍潭正祭法所云不在祀典者也且古者名山大  
川之祭五嶽視三公四瀆視諸侯蓋祭之牲幣視公侯饗餼之禮  
非錫之命而加之爵也今四海之龍已封王號若一潭偶有靈應  
槩得封王揆以古禮難免黷亂再查古之祀典分天神地祇人鬼  
爲三惟人鬼爲之立廟而神祇皆祭以壇所謂知鬼神之情狀也

龍潛深淵而乘雲氣願乃象以衣冠庇之棟宇非其情狀明矣且  
廟必招僧道以守之建廟買田奪民之業以奉游手殊非政體瀕  
海邊徼之民惑於鬼神正當示以常道各省會城皆有山川壇  
載在祀典應令該撫春秋親祭旣爲民請命亦可令民聽不惑其  
所請封王建廟之處俱無庸議從之○以長柱爲內閣學士由給事中  
遷○庚午諭朕自正定回鑾固城祁水之間有縣焉與堯母同名  
雖述古之義也觸目踟躕於意弗安其易之仍爲望都○壬申  
上奉 皇太后駐蹕保定府○恤黑龍江被水災民○戊寅 上  
奉 皇太后還京師○己卯調開泰爲江西巡撫陳宏謀爲湖北  
巡撫○庚辰諭大學士張廷玉服官數十年日侍內廷勤勞敬慎  
夙夜靖共靡間寒暑今年逾古稀每日晨興赴闕未免過勞朕心  
軫念古大臣有於居第視事數日一至朝堂者嗣後可倣此意不

必向早入朝或遇炎蒸風雪或自度宜於少休亦不必勉強進內  
其有應辦事務可以在家辦理俾得從容頤養精力自加強健以  
示朕優眷老臣之意○辛巳諭大學士張廷玉步履微覺艱難吏  
部引見月官不必勉強帶領○壬午諭據安徽巡撫潘思渠奏安  
省自乾隆元年至今未獲盜案共一百一十六起而已獲各案亦  
拖延未結可見從前封疆大吏全未留心整飭董率屬員以致積  
案繁多似此懈怠廢弛盜風何由甯息著將乾隆元年以來歷任  
巡撫交部查明察議具奏署按察使都隆額赴任已及二年塵案  
纍纍不能實力辦理難稱臬司之任著回京供職安徽按察使員  
缺著赫慶補授其令潘思渠董率各屬設法購緝嚴催完結於一  
二年後具摺奏聞以收緝盜安民實效○癸未大學士等奏據御  
史萬年茂參奏學士陳邦彥于振於本年八月瀛臺賜宴之日向

戶部侍郎傅恆屈膝請安一摺臣等查問陳邦彥于振俱云並無此事及詢其同班裘日修董邦達亦云未見至萬年茂指證之大學士史貽直尙書王安國皆係大臣若果有見聞豈有不行具奏之理是該御史所奏毫無實據應請交部察議得旨朕前覽萬年茂參奏陳邦彥于振一摺在伊以持國體爲言朕因關繫陳邦彥于振二人之名節而傅恆若妄自矜大致詞臣如是趨奉亦當有應得之罪彼日卽召劉於義汪由敦舒赫德王安國面詢以此事之有無劉於義等三人咸以爲子虛而王安國則以爲傳聞彼二人實因錯認臣亦聽得此語而實未目覩朕復令大學士張廷玉訥親查問今據奏稱事屬誣捏請將萬年茂交部察議朕思陳邦彥于振皆係廢棄之員因其尙嫻於文翰復用爲詞臣以備編纂之任伊二人年已遲暮亦當自知無進取之階豈尙希冀升遷而

反求榮含垢乎即使躁進患得之心不息思獻媚以僥倖則凡諂媚於人者必在暮夜幽僻之時焉有大廷廣眾之中而爲此忍恥屈膝之事以自召訕謗者乎在傅恆世族舊臣可望成器是以加恩令在軍機處行走使之練習政務然官不過侍郎地未參密勿較之大學士張廷玉訥親被朕任用已久者實異設使陳邦彥于振獻媚干求亦當在彼而不在此也且卽大學士張廷玉訥親爲朕素所倚任亦不過贊勦機務至於用人之際朕自主之伊等亦必俟詢問其人之賢否然後據實陳奏初不能以己意爲進退也卽在廷大臣於召對之時從不敢援引所私此舉朝所共知者朕何如主豈委用人之權於臣下者哉況是日侍宴之時諸臣齊集眾目難掩朕將此詢問張廷玉訥親劉於義汪由敦舒赫德等咸稱未見亦無所聞惟王安國奏稱臣未看見但聽人言二人錯認



而萬年茂又稱聽說史貽直彼時曾面責于振不是不知說甚麼止見史貽直怒目看他等語史貽直與于振朕知其向有親誼果見其如此行爲必將爲之容隱或於私第責讓則有之豈肯於大眾之前顯揭其短旣已對眾斥責史貽直身爲大學士何敢隱而不奏乎今若因萬年茂牽引口舌之事派王大臣令大學士尙書質問國家更無此體矣伊此外又牽引學士講讀編檢多人且伊所牽引之人亦稱陳邦彥等錯認人了夫錯認人所難免萬年茂旣稱爲錯何以又將周長發等舉出爲證乎伊之情詞閃爍非遁卽支而信口捏飾污人名節所關亦非淺鮮乃猶緝緝翩翩假他人之口以文其影射之工牽引尙書等官思興大獄其心甚不可問從前湖廣余銓出身不正一案萬年茂奏稱素不認識余銓並與彭維新亦未謀面而彭維新私將伊名填寫文內咨送吏部等

語朕令大學士等詢問彭維新彭維新奏稱本年二月內湖北人  
僉云余銓係程姓世僕不當與會並將余銓姓名塗抹其時萬年  
茂身爲會首屢爲附和不得諉爲不知且萬年茂託人准出結官  
先行檢舉之呈更不得諉爲不知反奏稱於余銓遠隔不知實據  
巧爲辭說爲余銓出脫欺罔反覆情狀畢露至臣與萬年茂未嘗  
不相見卽如前二月內祀神宴會則竟日晤接彼此交揖團拜今  
奏稱與臣未曾謀面又未曾與臣一揖誕幻傾險等語彼時朕因  
此案見在行查且係口舌之事有關大臣言路之體暫存未發今  
伊所奏之事與前意相同又係污蔑詞臣且余銓一案該省已審  
明家僕是實則萬年茂反覆狡詐之處百喙難辭著交部一併察  
議具奏尋革職○吏部議奏福建巡撫周學健咨覆調任糧驛道  
菩薩保調任泉州府同知梁須楨失察屬員收受陋規不行揭報

照例降三級調用得旨依議向來道府因公呈誤例應降調者俱著詢問該督撫如居官尙優照所降之級留任如係平常之員卽照部議降調同知通判州縣則令該督撫出具考語送部引見而州縣佐雜則又係問督撫以定去留朕思道府爲地方大吏較同知通判等官更屬緊要未便如州縣佐雜一例止據督撫考語遂以爲定見在同知通判州縣有因公降調者經朕降旨送部引見不必開缺其道府既有應得之處分亦應令其來京引見不必開缺則該員賢否朕得再加鑒別以定去留伊等若得回任亦必更加勉勵嗣後俱著送部引見再降諭旨此本內菩薩保梁須梗卽遵此旨行○甲申調竄滿岱爲盛京兵部侍郎以長柱爲盛京工部侍郎由內閣學士遷○丙戌諭朕命翰林科道官輪日進講經史本欲研究經術闡明義理以淑心身以鑑興廢而諸臣論講往往闕入

條陳若實有裨政務則亦何害要不當借端立說以逞私見也卽  
朕回鑾後數日內如檢討程忬舉程子一命之士苟留心愛物於  
人必有所濟一條因請重縣尉之選欲以士人初任是官而重其  
秩是一縣又增一令也成何政體今日御史馮秉仁進講因名山  
升中於天一句摺中引宋祥符中有事泰山往還四十七日未遇  
雨雪等語其意蓋因朕昨登北臺氣候晴暖曾宣示在京大臣故  
爲此影射之詞且豫擬朕今年巡幸山西將來當有東巡之事故  
爲此奏耳夫曲阜 聖人宅里自漢祖以來謁廟行禮流傳於史  
冊者指不勝屈我 皇祖聖祖仁皇帝瞻拜 孔林禮儀宗重前  
代莫與比隆至岱宗喬嶽近在魯邦彼慕封禪之虛名襲七十二  
代之故事先儒嘗議朕所熟聞若乃觀車服禮器以伸嚮往因之  
觀風問俗則循 聖祖之家法溯虞夏之遺規亦屬省方鉅典果

其年歲順成時可舉行朕豈因人言而遽止又豈因臣下進說而輕行彼窺測逢迎之伎倆舉無所施焉秉仁果何所見而爲此奏耶朕觀近日大小臣工之弊九卿部院諸臣不過循分供職自以爲可立無過之地然尙無敗檢踰分欲有所爲者此所謂失之不及也至御史一官多不得人如萬年茂之奏于振陳邦彥一事牽引支離譸張爲幻李兆鉦請惜字紙直欲繩以官法瑣屑不經更屬無謂其識見卑鄙不可見之施行或留中或發還本人者不知其凡幾此皆意有他欲而借言以沽名者所謂失之過也過與不及雖同然以朝廷政治言之臣工之弊與其過毋甯不及宋仁宗贊曰國未嘗無嬖倖而不足以累治世之體朝未嘗無小人而不足以勝善類之氣此之謂也夫言官之設本以繩愆糾謬激濁揚清朝廷之得失民生之利病無不可剴切敷陳內而廷臣外而督

撫果有貪劣奸邪實據指名彈劾亦足表見風裁若徒事懷私窺伺何以克稱言官之任比來伊等習尚如此不可不亟爲整飭向來御史由保舉考試補授後因臣工條奏請朕於翰林部屬引見時記名特用今看來不若仍復舊制之爲安著九卿於應行考選人員內秉公保舉請旨考試引見候朕簡用其見任科道著大學士九卿通行甄別毋得稍存瞻徇以肅言路再朕向曾留心詩賦不過學問中之一事時於幾餘遣興偶命近臣屬和亦前代翰林典故中所有並非誇耀己長與文人角勝而治天下之大經大法端不在此詞臣以文字爲職業自當雅贍優嫺方不愧清華之選其中才學充裕如張鵬翀沈德潛等閒或一加超擢而躁進之徒競思進獻若借此可以爲梯榮之捷徑不知沈德潛優升閣學朕原因其爲人誠實謹厚且憐其晚遇是以稠疊加恩以勵老成積

學之士張鵬翀素知其敏捷且資俸已深厯升詹事初不因進詩  
優擢若謂朕進用人才沾沾於文藝之末雕章琢句專事浮華此  
風一熾必有藉手捉刀希圖僥倖者豈不玷玉堂而貽羞文苑耶  
其務殫實心崇正學明大體以無負稽古論思之厚望著一併傳  
諭知之○諭今日禮部將郎中陳豫朋年老乞休員缺題補引見  
陳豫朋於今年三月經朕點用湖南學政謝恩時摺內稱年已七  
十有餘朕因其年老恐不能勝任另派員更易今止隔數月忽以  
年老乞休陳豫朋若自知年力衰邁則未授學政以前便應告休  
及點授學政之時亦當據實陳請何以寂無一言今於朕降旨仍  
留部曹後忽爾告退蓋亦自知嗣後無升遷之望並非恬退爲懷  
也夫致身事君終始不渝乃分所當然鞠躬盡瘁之義凡爲臣下  
者何人不當以此自勉昔 皇祖時漢臣中間有蹈此習者曾蒙

訓飭今陳豫朋於進退之際少不如願卽欲解組以鳴高事君之道固如是乎陳豫朋著革職留京候旨向例四品以下官員吏部入於彙題內開缺嗣後告休人員內有與陳豫朋相類者著吏部具摺請旨如徇情入於彙題查出必加以處分餘仍著照例彙題朕君臨天下向之所學且不必論卽以歲月計之十年於此矣大小臣工居心行事已無不洞悉其情僞古帝王垂旒黻纁不以察察爲明朕平日之包荒不可勝數但如陳豫朋之所爲若不明白曉諭則竟無以明事君之義矣諸臣工其共懷之○戊子調嚴瑞龍爲湖北布政使以王興吾爲河南布政使由按察使遷○己丑吏部議奏湖廣總督鄂彌達疏參湖北驛鹽道曹繩柱勒借虧空一案奉旨將濫行保薦之上司照例察議應將原任湖廣總督鄂彌達湖北布政使安圖降調前任湖北巡撫晏斯盛湖北按察使石



去浮見終養在籍應於補官日降級調用得旨安圖著降三級調用鄂彌達著降二級調用石去浮著於補官日降二級用晏斯盛著於補官日降一級用○以舒輅爲河南按察使

由陝西糧道遷

十一月癸巳諭朕因近來言官陳奏撫拾浮囂習成風氣不可不嚴加整飭降旨令大學士九卿甄別科道但思伊等之不識政體敢於妄行陳奏者亦因朕向來優容含納屈意包荒所致今若因李兆鉦陳奏紕繆卽將同官通行甄別非朕數年來廣開言路兼收並包本意著止將李兆鉦交部議處又宜兆鼎久在言路一無建白殊忝言官之職亦著交部察議朕觀諸大臣意中亦似有以甄別爲難者在公正任事之道不當若是但旣以爲難則甄別之時亦不過苟且塞責未必盡能允當所有通行甄別之處著停止今補放御史照舊例保舉考試而後引見可望言路之肅清而見

在之科道等經朕降旨訓飭自當省察警動痛加改悔如其復蹈故轍朕必隨時懲治以正臺垣風氣勿望更爲姑容矣○丙申命直隸保定府建倉貯穀備用○免江蘇山陽等二十四州縣衛本年漕糧○己亥撥浙江倉穀十萬石於江南備賑○己酉諭內閣學士張若藹在內廷行走十餘年小心勤慎能恪遵伊父大學士張廷玉家訓朕望其將來尙可有成今秋扈從於途次患病隨遣御醫調治且令先回冀卽痊可以慰伊老父之心不意遽聞溘逝深爲憫惻伊從前曾襲伯爵因其與定制不符是以令在本任供職今著加恩照伯爵品級賞銀一千兩料理喪儀大學士張廷玉年逾古稀遭此傷痛殊難爲懷可傳諭令節哀自愛勉副朕軫念之意○戶部議覆本部侍郎雅爾圖奏臣前奉命赴豫該省民壯各執械迎送詢其技勇一無所長實於防護無益似應急裁但外

省州縣以多役爲便行令查議必力爲支飾請徑行飭部議裁等語查民壯一項自乾隆五年裁減後統計各省尙存四萬五千餘名今該侍郎旣目擊豫省情形則各省大約相同應請通行直省督撫據實查覈將各州縣所設民壯虛充名數者卽行裁汰毋任州縣藉詞支飾濫請存留果實在必需卽將該地方難以裁減情形具題再議從之○辛亥兵部議覆川陝總督公慶復奏軍營功過一案署四川提督李質粹到木魯工軍營捏報焚礮投誠接任總統後督率剿撫三甲納兆烏石三谷細納洪多曲工等賊寨親身督戰然從前因循貽誤已多仍當議處總兵宋宗璋初到軍營但事招撫自調赴中路每戰必克遂令班滾勢窮副將馬良柱連克賊寨奮勇直前惟不能防範江卡兵逃致各土兵觀望以上二員功多過少仍請議敘等語應將李質粹照例革職宋宗璋馬良

柱均照三等軍功議敘得旨李質粹著革職發往軍前自備資斧效力贖罪宋宗璋著加一級餘依議○壬子以書山爲內閣學士

由太僕寺卿遷

○癸丑諭三年京察之典激濁揚清所以敘官方而明黜

陟自當矢慎矢公甄別允當上次舉行之際恐各部院堂官有瞻徇情面濫列一等者曾降旨令大學士於驗看過堂時慎重分別有不稱一等者俱行裁去嗣經大學士等分別去留此亦權宜辦理之道究之察覈司員惟堂官最爲親切要在平日留心體察臨時舉劾公平方爲允協如上次定以一等者三年中行走平常卽當改爲二三等不得稍存姑息之心上次原列二三等三年以來知所奮勉卽當列爲一等亦不得仍拘已成之見惟一秉至公分別等第庶察典肅而人人知所勸懲明歲又屆京察之期特先行傳諭各部院堂官知之○是月浙江巡撫常安奏浙省乾隆丁卯

年地丁錢糧業經奉旨蠲免舊欠錢糧一併緩徵惟漕項錢糧無分新舊照例徵收但浙省舊欠漕項多屬零星鄉民艱於交納查江省積年漕欠經江蘇撫臣陳大受奏明同舊欠地丁一併緩俟開徵之年徵輸江浙事同一例請卽遵照辦理至丁卯年應徵新漕非零星可比已豫飭州縣覈明確數纂單頒給得旨此與陳大受所奏不同蓋江省係本年之漕項已經於上年開徵則本年並無漕項可徵應與地丁一例俟開徵完納汝浙省見有應徵之新漕則漕項之積欠隨漕而徵想亦不致零星瑣碎且小民無地丁之催擾正可完漕項之積零而開徵地丁所交反少豈非一舉而兩得如汝所奏皆未細心體察不過聽幕賓屬員之言耳又奏據杭州嘉興湖州三府稟稱本年七八月間各村桑樹生有小蠶食葉成繭用以織紬較他紬更爲堅緻詢之土人僉云此名天蠶又

名桑蠶往年不過數枚惟今年所產最繁各鄉村徧野皆有民間  
獲此餘利靡不懽欣鼓舞臣隨取繭絲查驗無異得旨覽奏俱悉  
此范成大詩所謂野繭可繰者也汝特未之知耳○大學士川陝  
總督公慶復奏川西番蠻雜處就中頑梗者雜谷金川爲最雜谷  
土司蒼旺貪狡殊常然外極恭順大金川土司莎羅奔性更兇悍  
前年與巴底相爭又屢與革布什咱土司爭地近更欺壓小金川  
去年竟有將小金川土司拏去之信經臣差弁嚴查直至瞻對已  
破方遣土目具稟軍前當嚴加申飭因地勢極險運糧無路且伊  
並非干犯內地要在該管文武務得大體令其彼此鈐制以保無  
事儻不遵割斷惟有以番禦番之法用眾力以收功得旨瞻對甫  
完功佳兵不祥所見極是然既有此事不可不留心也○貴州總  
督張廣泗奏升任布政使愛必達居心純正識見明通凡苗情民

俗吏治軍行諸務俱見精明透徹今蒙升授山西巡撫不日即可  
啓行至新任布政使孫紹武幹練明達勇往有爲久任黔省風土  
苗情尤爲熟悉以甫經實授之道員一歲三遷將來自必更加奮  
勉得旨覽又批此人亦有出息者方命愛必達往黔時朕尙未識  
其人後陞見始知之而且久於黔省似較愛必達爲尤熟悉地方  
情形故今別用愛必達亦得放心造就人材以備任使朕用人苦  
衷外人豈能知哉

十二月癸亥 上幸果親王弘瞻第○己巳命十年一修 玉牒

○癸酉賞喀爾喀被災人戶銀一萬兩○甲戌調岳濬爲山東布

政使以溫福爲湖南布政使

由郎中遷

○丁丑諭大學士張廷玉年老

內廷行走需人扶掖其子庶吉士張若澄著在南書房行走○庚

辰以劉綸爲內閣學士

由大理寺卿遷

阿蘭察爲太僕寺卿

由山東布政使遷

○

癸未準噶爾台吉策妄多爾濟那木扎勒遣使臣瑪木特等至京進表請安貢方物 上命尙書海望等詢問來使據瑪木特稟稱我等前往西藏一切舉行善事念經之人其施恩照管及資助牲畜之處伏乞憐念再念經之事需銀甚多我等前往東科爾貿易之人交易時乞飭令內地商人以銀收買伏乞轉奏海望等言我大國交易之例聽商自便難用官法抑勒從前已經曉諭爾等今爾台吉以念經之事需銀甚多復行懇求俟轉奏候旨奏入報聞○乙酉召見夷使瑪木特等諭曰爾台吉奏疏朕已覽閱一切事宜皆遵奉朕諭旨辦理看來如此恭順必能安伊屬人裨益部落朕甚嘉悅再爾求照看爾等念經之人資助牲畜盤費自應照前次賞賜之例加恩賞給至懇求貿易時用銀買爾等貨物止可隨商賈之便朕不便降旨於商人見派侍郎玉保前往照看爾等爾



等與玉保商議酌量凡事屬可行者會議具奏瑪木特仰瞻行禮  
賜茶跪領祇領訓諭畢退出尋命尙書海望等宣諭瑪木特等曰  
爾等意欲頗羅爾資助念經人等頗羅爾雖係承受朕封號之人  
究係部落不比內地臣民彼資助與否朕不便降旨應聽伊自主  
故特諭爾等知之○是歲朝鮮來貢○會計天下民穀數各省通  
共大小男婦一萬七千一百八十九萬六千七百七十三名口各  
省通共存倉米穀二千五百五萬四千八百一十四石三斗八升  
七合七勺零

東華續錄

乾隆二十五

臣王先謙敬編

臣周澐恭校

乾隆十二年丁卯春正月甲午諭朕嘉惠黎元以次輪免天下正供山西遼省地丁應於戊辰年全免但該省太原平陽潞安甯武澤州蒲州六府遼沁平忻代保解絳八州及歸化城各協理通判所屬有額徵本色米豆穀麥一項以供滿漢官兵糧餉例不蠲免其實計田納賦本色卽與地丁無異今應納地丁者均已蠲免其供輸本色者雖係支給兵餉未便槩予蠲除但此次特沛恩膏亦應量加愷澤俾伊等得以均霑著將太原等府州縣應徵本色酌免十分之三其大同朔平二府地處邊瘠頻年歉收著全行蠲免該部卽遵諭行○丙申諭國家立綱陳紀布在方策所以明昭代

之章程備諸司之職掌以熙庶績以示訓行典至鉅也大清會典  
修於 皇祖聖祖仁皇帝康熙二十三年越我 皇考世宗憲皇  
帝御極之初卽允禮臣之請開館重修九年告竣刊梓頒行閱今  
又二十年矣其間因時制宜屢有損益向來諸臣每有以重修爲  
請者朕以國家定制豈容數更踵事增文自有部冊故槩未准行  
近以幾餘時加披覽間爲討論乃晰由來有不得不重修者蓋緣  
編纂之初諸臣或沿襲舊文未經考證或略存近制未溯本源或  
限於案牘之不全或誤自參稽之不審而又未嘗請旨取裁斟酌  
至當故舛譌疏漏均不免焉夫唐虞分職具載典謨周室經邦詳  
於官禮書曰監于先王成憲又曰其爾典常作之師旣謹度以惟  
貞宜有條而不紊矧際重熙累洽之期當禮明樂備之日較幾愼  
憲職惟其時是當博考朝章詳稽故實正舊編之紕繆補紀載之

闕遺用歲成書垂示法守所有一切開館事宜該部定議具奏○  
丁酉特授庶吉士張若澄爲編修○己亥諭福建閩縣地丁項內  
有先賢二十三祠祭產田糧一項本朝初年優免後於雍正五年  
該地方官清查溢額錢糧之時誤將此項作爲溢額報解歸公見  
在追徵充餉朕思祠宇祭產供俎豆牲牷之用歷來優免以恤奉  
祠後裔原屬國家曠典著該督撫查明豁免永著爲例所有此項  
歷年未完積欠一併蠲除○壬寅大學士等議覆升任福建巡撫  
周學健奏閩省沿海貧民生計維艱因思上竿塘下竿塘西洋嶼  
東獅白畎東洛西洛大嵒山小嵒山烽火衝浮鷹山四礮山七星  
嶼南關山等十四島縣延數百里環繞於閩縣長樂連江羅源霞  
浦甯德福鼎各界若一經開闢數邑貧民皆得藉以謀生向慮有  
洋盜哨聚因加禁止今海宇澄清遊巡絡繹竿塘等島更屬偏近

內地應請一併弛禁令殷實土民前往開闢等語係爲貧民生計起見但事關海防必審度形勢籌酌盡善應飭交該省督撫再加查勘定議從之○癸卯准福建商民赴臺灣販運米穀○甲寅命大學士慶復查閱甘肅營伍○乙卯賜準噶爾台吉策妄多爾濟那木扎勒敕書曰閱爾奏書爾能仰體朕加恩之意諸事俱遵旨辦理如此恭順必能安爾屬下利爾部落朕深爲嘉悅所奏往西藏念經人等有俟貿易後始往念經有卽將貨物帶往念經者俱懇在哈集爾得卜特爾過冬俟貿易人由東科爾回會齊同往之處俱已照所請行至爾使臣瑪木特口奏念經人需用牲畜祈降旨頗羅鼐令其協助東科爾貿易時俱令以銀兩交易等語頗羅鼐雖受朕封號究係遠方部落之人非內地臣民可比其資助與否朕未便降旨至需用馬匹口糧朕自加恩照前賞給卽頗羅鼐

此次或多爲資助亦未可定至貿易人等銀貨交易止可各從其便不可以官法扣勒但爾旣特行奏請亦非甚難行之事見在照看爾使臣前往仍派侍郎玉保已令玉保與爾使會商計議而行爾使回時自能詳告也嗣後爾宜益加敬慎永歸和好以體朕廣教安民之至意特敕付來使齎回隨敕賜各色段十端綵段十端玻璃瑱瑯甕器十八事○以吳謙誌爲廣東按察使

由直隸天津道遷

二月壬戌諭據甯古塔將軍阿蘭泰奏稱永吉一州設在吉林烏拉係甯古塔將軍所轄地方該州向隸奉天府一應辦理旗民事務俱申報府尹轉咨不但稽延時日且於辦理事件多至掣肘請將永吉州改設理事同知屬甯古塔將軍管轄等語著照該將軍所請永吉州改設理事同知管理該州事務其作何裁改一應事宜交與該部定議具奏○癸亥 上御經筵○丙寅兵部密議福

建巡撫周學健奏請閩省營員迴避本省一疏得旨此所奏密議閩省營員迴避本省因周學健奏該省兵弁積習驕悍瞻徇掣肘就事論事專從閩省而言但各省營弁俱不迴避本省而獨行之於閩夫營員瞻徇掣肘之習豈惟閩省爲然從前慶復亦曾奏滇省武員專用土著宜爲變通可見各省情形大率相類卽所謂密令該督漸次調補雖係潛移默化之道而閩省人員不無揣測疑議且於事理亦未爲公當在古人官於故里臨治其鄉者史冊多有然時勢不同伊等卽於民事無涉而瞻顧親情在所不免迴避之例旣可行之文職何獨不行之武臣旣欲行之閩省何獨不行之他省除千把微員照所議無庸更調外其守備以上俱應隔省補用其水師營員洋面情形雖別而操防駕駛略同且閩粵江浙相去不遠亦應隔省調補著兵部一併另行詳悉定議具奏國家

辦事明白正大原無可隱諱即使稍有闕遺亦所謂君子之過如日月之食人皆見之雖密亦無能揜至於事當詳慎自有不可不爲謹慎之處究之密於前而不能不明白宣布於後故前降旨部院堂官將密議事件如何刪節行文分晰定議看來事經交部勢卽不能甚密且機務繁多章程難於賅括而無知之輩不知密議向來所有一似新設科條反以滋其疑議殊未妥協朕思軍機處係機密之地所交密議章奏本無宣洩其應交該部密議者嗣後俱交軍機處記存檔案交發部議其奏事處所奉密議事件著亦交軍機處記檔轉發其應行裁節者臨時斟酌請旨如此則檔案有可稽查事機始終慎密亦無由啓窺測揣度之弊前所定議原旨不必行○丁卯截漕糧十萬石於山東備賑○戊辰 上謁

東陵啓鑾○壬申

上謁

昭西陵

孝陵

孝東陵

景陵回



鑒○癸酉諭軍機大臣等據紀山奏稱大金川土司莎羅奔侵占革布什咱土司地方彼此仇殺又誘奪伊姪小金川土司澤旺印信並把守甲最地方揚言欲攻打革布什咱等語苗蠻易動難馴自其天性如但小小攻殺事出偶然卽當任其自行消釋不必遽興問罪之師但使無犯疆圉不敢侵擾於進藏道路塘汛無梗彼穴中之鬪竟可置之不問如其仇殺日深勢漸張大或當宣諭訓誨令其息憤甯人各安生業亦當相機行事聲威足以懾服其心使之弭耳輸誠方爲盡善苗蠻頑梗無知得其人不足臣得其地不足守蠶屯蟻聚無足深較儻果有抗拒侵軼不得不宣布皇威以全國體亦當相度機宜慎之於始不可輕爲舉動但不可因遵朕旨卽或有關國體不得不示以國威者亦一味因循惟在慶復紀山等詳審事勢令輕重合宜耳卽如瞻對一事初亦非敢有侵

犯而一經辦理不免命將出師並由京城派員前進直至大學士  
慶復親往經略始得安輯皆由事前不能先有成算以至於此足  
見撫馭遠夷全在機宜合要邊吏喜於生事營弁不知遠謀往往  
過爲張皇因小釀大不知千鈞之弩不爲鼷鼠發機惟常警修守  
禦厚蓄聲威令其畏憚奉法恩撫威懷各得其道先事豫籌無致  
輕有舉動○甲戌 上幸盤山○申禁喪葬演戲○丙子飭修永  
定河隄壩○裁浙江玉環同知缺移温州府海防同知駐玉環○  
己卯諭向來下五旗大臣官員內有因宣力出色特恩擢入上三  
旗者四川巡撫紀山係平郡王屬下伊父額勒恩特依曾在軍營  
宣力陣亡紀山在巡撫任內亦甚勤勞著將紀山擢入正黃旗滿  
洲旗分再理藩院尙書那彥泰宣力多年著將那彥泰擢入正白  
旗蒙古旗分○癸未 上還京師○丙戌大學士等議准福建巡

撫陳大受奏暹羅產米甚多向例原准貿易向來獲利甚微與販者少今商人等探聽暹羅木料甚賤易於造船自乾隆九年以來買米造船運回者源源接濟較該國商人自來者尤便但無牌照可憑稽查未爲嚴密且恐守口兵役藉端索詐致阻商民急公之念應請給牌照以便關津查驗其無米載回止造船載貨歸者應倍罰船稅示儆從之○丁亥 上親耕藉田○諭武員定例部推月選之缺向卽迴避本省惟題缺各省督提有將本省人等豫行保舉缺出掣補者亦有指缺題補者部中雖執例不准而朕施恩准用者多故武員之用本省者率由於此也乃武員習爲故常竟似應行補用本省而以調用別省爲苦矣卽升銜調缺亦多以爲未便試思部中推選豈能坐用本省之缺此皆以一己之私見昧國家之常度不知官員迴避本省原屬定制當然卽准其題補於

五百里外及以隔府別營補用亦不過爲地方人材起見並非令伊等得以自便其私今兵部議令遵照定例迴避自應仍復舊制第念伊等旣經保舉註冊必俟別省缺出始行掣補未免需次艱難朕思副參爲武職大員不應題補本省之人嗣後無論陸路水師缺出俱著停其題補其遊擊都守等官與副參官級稍遜且有副參統轄稽查諒亦不至瞻徇掣肘可仍照見行之例辦理此係朕格外體恤之意非爲伊等寬其繩檢也至年滿千總一項部議發往他省伊等係本省拔補微員候補人多一時難以得缺發往他省不無俯仰拮据之慮仍著留本省補用其副參等官作何迴避升調之處該部另議具奏尋議水陸副參分別升調八款一水陸副將向無論俸推升之例應卽於各該督所轄省分內酌量對調一陸路參將爲數無多且俱係小銜一二年開照例推升加銜

一等改調他省此時毋庸改調一水師參將除廣東肇慶內河水師一缺外並無部推之缺嗣後遇俸滿推升臣部將該員升銜一等請旨分發鄰省以相當之缺題補至籍隸本省水師之大銜遊擊例應推升參將者嗣後本省不便保題遇俸滿推升亦照此辦理一已經豫保註冊應升副參之參遊內有籍隸本省者臣部於鄰近省分互相掣調一水陸見在遊擊籍隸本省者仍准一體豫保照見在分定鄰省掣補之例掣補一參遊推升例應留任一次者槩不准仍留原任卽加銜一等令赴新任一河營無操防地方之責嗣後缺出該省將籍隸他省之河員題補如無他省熟諳河務之員仍於本籍人員內保題請旨補用一已經題補未經引見之籍隸本省副參俟引見時於綠頭牌上聲明請旨簡調從之○  
戊子原任內務府大臣丁阜保年屆百齡賜 御書扁額及朝服

銀幣○己丑駐藏副都統傅清奏據郡王頗羅鼐告稱訪得策卜  
登台吉已獲罪被殺並其妻子及其叔父果莽堪布喇嘛皆被殺  
果莽堪布喇嘛之缺已令扎什倫布之阿克巴喇嘛補授阿克巴  
喇嘛之缺已令羅卜藏丹怎補授策妄多爾濟那木扎勒之姪女  
許與拉藏汗之孫納噶查爲妻見在彼處所最重者是納沁宰桑  
納罕宰桑巴雅斯瑚朗宰桑小策零敦多卜固子宰桑等但因其  
台吉已亡新立台吉年幼用事之人彼此不和惟恐阿卜都爾噶  
里木哈薩克土爾扈特喀爾喀等處發兵襲之所以防範卡座甚  
嚴報聞○是月大學士管川陝總督公慶復奏審訊故道阿炳安  
侵帑一案嚴鞠協領德明寄頓銀兩已據招認惟銀數不符見在  
審究查追又據阿炳安家人蘇勒供稱乾隆四年正月曾將銀四  
千兩用木匣盛送大將軍查郎阿交伊家人安七轉呈收受等語

但一面之詞未便指爲確實安七又在京師難以查辦謹據實奏聞得旨查耶阿係 皇考所用之舊大臣朕不忍置之於法此事不必根究朕自有處

三月癸巳 皇后行躬桑禮○乙未裁陝西同州府潼關縣歸撫民同知轄○丙申重刊十三經注疏二十一史告成 御製十三經序曰班固氏曰六學者王教之典籍先聖所以明天道正人倫致至治之成法也漢代以來儒者傳授或言五經或言七經暨唐分三禮三傳則稱九經已又益孝經論語爾雅刻石國子學宋儒復進孟子前明因之而十三經之名始立自宋易漢唐石刻之舊五經始有板本及明南北監板行而箋疏傳義臚列具備學士家有其書傳習彌廣顧訓詁繁則踳駁互見卷帙重則不亥易譌或意晦於一言之舛或理乖於一字之謬校讎疏略疑誤滋多承學

之士無所取正我朝 列祖相承右文之治 皇祖聖祖仁皇帝

研精至道尊崇聖學五經具有成書頒布海內朕披覽十三經注

疏念其歲月經久梨棗日漸漫漶敕詞臣重加校正其於經文

誤字以及傳註箋疏之未協者參互以求其是各爲考證附於卷

後不棄舊觀刊成善本非徒備金匱石室之藏而已書曰學于古

訓乃有獲傳曰經籍者聖哲之能事其教有適其用無窮朕咨采

救幾實無審定之暇亦無鑒古之誠而惟是緝熙邇志日就月將

則有志焉而不敢不勉繼自今津逮既正於以窮道德之間奧嘉

與海內學者篤志研經尊崇實學庶幾經義明而儒術正儒術正

而人才昌恢先王之道以贊治化而宏遠猷有厚望焉 御製二

十一史序曰七錄之目首列經史四庫因之史者輔經以垂訓者

也尙書春秋內外傳尙矣司馬遷創爲紀表書傳之體以成史記



班固以下因之累朝載筆之人類皆嫻掌故質舊聞旁羅博采以成信史後之述事考文者咸取徵焉朕旣命校刊十三經注疏定本復念史爲經翼監本亦日漸殘闕並敕校讎以廣刊布其辨譌別異是正爲多卷末考證一視諸經之例明史先經告竣合之爲二十二史煥乎冊府之大觀矣夫史以示勸懲昭法戒上下數千年治亂安危之故忠賢奸佞之實是非得失具可考見居今而知古鑒往以察來揚子雲曰多聞則守之以約多見則守之以卓豈不在善讀者之能自得師也哉○禮部議覆甘肅巡撫黃廷桂奏甘省土司與州縣衛往來文移向無一定體制請將土司三品至六品分爲三等指揮使及指揮同知列爲一等與州縣衛守備往來文移用平行手本僉事列爲一等州縣衛守備與僉事用照會僉事與州縣衛守備用牒呈千百戶列爲一等州縣衛守備與千

百戶用牌票千百戶與州縣衛守備用申文查指揮使及指揮同知雖係三品其體統不得與內地之三品等文移平行不足以資彈壓請將該撫所分土司三等之處分爲二等其指揮使及同知僉事職銜者與州縣衛守備往來文移州縣衛守備用照會指揮使及同知僉事用牒呈其千百戶與州縣衛守備往來文移州縣衛守備用牌票千百戶用申文再該撫稱同知管轄土司與知府之表率全郡者相似應將指揮使指揮同知列爲一等與同知文移用牒呈同知用照會僉事千百戶列爲一等與同知文移用申呈同知槩用牌票查同知與州縣衛同屬統轄土司之員章程自宜畫一應令指揮使指揮同知僉事與同知文移用牒呈同知用照會千百戶與同知文移用申呈同知槩用牌票從之○庚子諭朕普免天下錢糧今歲係安徽輪免之年聞該省有馬田稻租一

項係歸公官田不在蠲免之列但念民佃終歲勤動不得一體邀恩未免向隅著加恩將馬稻租息蠲免十分之三俾耕佃農民均沾實惠○以固倫和敬公主下嫁科爾沁輔國公色布騰巴勒珠爾授爲固倫額駙○辛丑諭大學士慶復在外多年綸扉重地應召取回京辦理閣務昨歲四川瞻對之役甫經告竣今又有大金川番蠻肆橫不法已命慶復相機征剿今思彼地番眾恃強滋事屢屢不能安輯必須經理得宜始可永就安帖貴州總督張廣泗於此等苗蠻情形素所熟悉貴州地方料理以來見在妥協苗眾向化可以無虞川陝總督員缺著張廣泗補授不必來京卽由貴州取道速赴川省大學士慶復俟伊到川之後將彼地事機情形詳悉告知或可回京或仍應留川一同辦理自行酌定不必急於赴闕也雲貴二省原係一人管轄著仍復舊制卽以張允隨授爲

雲貴總督圖爾炳阿著授爲雲南巡撫孫紹武著授爲貴州巡撫

圖爾炳阿孫紹武俱由本省布政使遷

○壬寅大學士查郎阿以老病乞休允之○

以永貴爲雲南布政使

由湖南辰永靖道遷

○以恆文爲貴州布政使介錫

周爲貴州按察使

由糧驛道遷

○甲辰嚴禁奸商典質米穀○乙巳諭

據副都統傅清奏稱郡王頗羅鼐病故頗羅鼐任事以來克盡忠

誠實心效力今聞溘逝深爲軫悼著加恩於彼處收貯錢糧內賞

銀一千兩料理喪事例應遣大臣致祭著派索拜前往祭奠應行

卹典該部照例查奏朕從前因念伊奮勉肫誠降旨令頗羅鼐保

奏一子承襲封爵頗羅鼐以次子珠爾默特那木扎勒堪以效力

具奏業加恩封爲長子今辦理藏衛格隆事務乏人卽將伊子珠

爾默特那木扎勒襲封郡王但年尙幼小甫經襲爵辦事格隆等

務如頗羅鼐在時同心協力黽勉辦理著傅清將此旨通行曉諭

知之○丙午命高斌爲文淵閣大學士兼吏部尙書以來保爲吏

部尙書協辦大學士調海望爲禮部尙書以傅恆爲戶部尙書德

爾敏爲戶部左侍郎由左副都御史遷○己酉諭軍機大臣等據紀山奏

大金川土司莎羅奔勾結黨羽攻圍霍耳章谷千總向朝選陣亡

並侵壓毛牛槍傷遊擊羅於朝等語經軍機大臣議令該督撫等

迅派官兵遴選將弁統率前往相機進剿已星速行文知照前將

張廣泗調任川陝總督已諭令速赴川省今觀紀山此奏勢不可

緩可再傳諭與張廣泗令其卽速前赴會同紀山相度機宜如慶

復已經赴川一同商酌進兵迅速剿滅毛牛迫近西爐逆酋敢於

侵擾傷及官兵勢甚猖獗總因前此瞻對之事辦理未善無所懲

創不足以震懾蠻心而所遣將弁輕率寡謀不知用兵節制兼之

崇山密箐饋運艱難曠日失時烏拉死傷甚眾此皆前事之失可

爲炯鑒今番千總陣亡由於陷伏遊擊甫經迎敵卽已受傷官兵輕進取敗土眾望風奔竄其疏忽輕率漫無紀律已可槩見張廣泗辦理貴州苗疆甚爲妥協此番進剿一應事宜專聽張廣泗調度申明軍律指授方略籌畫糧餉迅速進兵務令逆酋授首剗絕根株以期永靖邊陲張廣泗在黔所知習於軍旅臨陣勇敢足以出奇制勝之將弁若欲帶幾員往川驅使亦可酌量帶往一面奏聞○庚戌濬江南天然閘○辛亥嚴禁海口需索陋規○乙卯命保送堪勝道府人員○戊午諭向來各省鄉試正副考官有通行考試之例亦有令大臣保舉者各科往往不同而外閒議論亦不一今歲係大比之年所有各省正副考官著將應行開列人員通行考試其不願考試者聽仍於應行開列中著大學士九卿等將學問優長精於衡鑒者各舉所知密封交送內閣進呈候朕酌用

如此考試與保舉並行內有保舉而考列優等者固可簡任文衡  
卽未經保舉而文藝入選者亦一併簡用則人材不致屈抑而眾  
心亦當允服矣該部卽遵諭行其非科甲出身及無真知灼見者  
亦不必強舉

夏四月壬戌諭山西布政使陶正中前任直隸道員來京引見時  
適值天津河間被災之際詢以地方情形伊陳奏賑恤事宜尙能  
明晰言及民間疾苦至於涕泣朕以其實心愛民之員是以特用  
爲藩司此朕用陶正中情節並非有人薦舉也去歲朕臨幸晉省  
見其辦理一切甚覺竭蹶今巡撫愛必達奏稱蒲州府知府朱發  
優柔寡斷詢之該司亦稱伊在任數年素日辦事亦無決斷難稱  
表率等語陶正中旣知屬員不能勝任何不告知阿里衮而聽其  
叢脞廢事乎藩司有佐理巡撫察吏安民之責陶正中止知拘謹

自守才力不勝藩司之任著補授直隸清河道朱一蜚著補授山

西布政使該撫既稱朱發不勝知府之任著解任來京該部帶領

引見

朱一蜚由直隸按察使遷

○甲子以辰垣爲直隸按察使

由天津鹽運使遷

○丙

寅徐琳

以不職革職

以劉芳靄爲湖北按察使

由甘肅漢道遷

○戊辰

命高斌往江南會同周學健查勘河工○命清理江蘇錢糧侵蝕

積弊○己巳以那蘇圖署直隸河道總督○孫嘉淦以老病乞休

允之以梅穀成爲左副都御史

由宗人府府丞遷

○乙亥諭大學士九卿

奏巡察御史應否差往兩議請旨差遣巡察官員原以令其稽查

地方事務之廢弛近因按年輪派遂均視爲泛常毫無裨益反於

地方滋擾殊非設立巡察之本意若不必限年更替俟應查之時

特派專員往查尙於事務有益盛京等處巡察官員俱照所奏卽

令撤回每屆三年該衙門將應否差員之處請旨其臺灣巡察官



員應否存留之處著交該督撫定擬具奏到日再降諭旨○命湖南長沙等處培築瀕湖隄垸○丙子命福建籌備臺灣積貯事宜○丁丑諭從來親民莫切於縣令而知府表率一郡職任尤重欲望其政平訟理易俗移風非久於其任不可漢宣帝詔曰太守吏民之本也數改易則下不安民知其將久不可欺罔乃服從其教化誠至言也朕臨御以來念保安元元守令最要曾向直省督撫屢降諭旨但未定有成例俾得遵循是以未見實效卽如州縣中才具稍優者督撫或奏請調繁或題補升用知府則薦擢監司在督撫爲官擇人練達之員試有成效駕輕就熟自較初任爲可觀究之缺有繁簡職守則一繁地固須能員簡邑獨無民人社稷之寄乎知府賢則屬縣各修其職監司體制雖隆而所職不過分巡轉覈或專司鹽糧轉不若知府之專有責成與屬縣較爲親切今

以能勝繁劇之知府擢任監司反若置之閒地不得盡展才猷且此題升題調者不過幹辦敏捷一時見長未必皆古所謂惓惓無華日計不足月計有餘循良之選也卽果係循良人地相宜而此地得一良吏卽彼地失一良牧孰非赤子孰不當善爲撫字而顧數數更易乎況能員旣得優加升調則熱中躁進之員惟事逢迎上司要結取譽以祈速化又安望其留心實政盡父母斯民之道也但榮進之念人情不免若非定有成規示以獎勵則歲月淹久必致自墮志氣而吏民無識亦謂其不爲上司所物色或啓疲玩之習不足以鼓舞人才振起治術漢時守令治行優異輒以璽書勉勵增秩賜金寵以車服有爵至關內侯者兩漢循良冠越唐宋今或倣其意而行之守令實能爲地方興起教化勸課農桑興利祛弊發奸摘伏阜安閭里者定以年限或予紀錄或加級或加銜

食俸仍留原任在恬靜自安者既得從容展布以收績效即躁進之人亦知格於成例不致視一官爲傳舍並可潛消奔競陋習於吏治人心不無裨益嗣後直省守令除特旨擢用及該地方情形不得不奏請調用者許其酌量聲明保奏外其如何酌定年限示以優敘俾可久於其任之處著大學士會同九卿詳議具奏尋議定例繁簡互調原爲酌量人地起見今各省督撫多有因調一缺將數缺遞行轉調借調補之虛名爲趨避之捷徑殊非久任愛民之道伏查雍正六年九卿議覆廣西巡撫金鉉條奏將各省道府同知通判州縣各缺分別衝繁疲難除道府請旨補授其同知以下四項三項相兼者於見任屬員內揀選調補原恐初任之員貽誤地方是以分別辦理雍正十二年直隸總督李衛奏稱從前所定繁簡未確當奉旨令各省督撫詳查據實具題經各督撫更正

有將選缺改爲要缺者亦有將要缺改歸部選者乾隆七年奉旨  
各省道府同知通判州縣等缺從前督撫辦理時不過據屬員開  
報以致繁簡之間多不的確著吏部行文各省督撫將從前所定  
各缺悉心妥議務期名實相稱亦經遵照酌定在案近年來各省  
仍有陸續奏改者是同一地方同一職守繁簡前後互異更改不  
一總之督撫酌留要缺在外題補本爲鼓舞人才但所留之缺既  
不切當又多遷就徒啓屬員覬覦今若仍照雍正六年以前部選  
例悉行裁改未免驟覺更張應再通行各省督撫將見定應題應  
調各缺詳覈更正造冊奏報其直隸州知州一項向不歸部選未  
便酌定但知府內之衝繁疲難者今亦請旨補放直隸州知州各  
缺應一併分別酌定統俟各省覆齊臣等再將更定各缺作何補  
用並如何酌定年限示以優敘之處一併詳議請旨從之○戊寅

論朕覽吏部奏議國璉一本止就伊自陳本內之詞議以才力不及降調前日察議孫嘉淦亦照伊自陳之本議以休致此雖因襲成案而朕以爲不然蓋孫嘉淦前因總督任內不能稱職有罪革退後復加恩用爲副都御史自履此任始則識見迂瑣撝拾條陳繼則因循保位一言不發而且年老衰邁不勝風憲之任國璉前任國子監祭酒時聞有簠簋不飭之處實不勝師表之職因其劣蹟未彰光祿寺係事簡衙門故行調用爲光祿寺卿乃屬員盜竊庫銀毫無覺察且性情偏執並不和衷辦事是以本年京察將伊二人察議所謂察議者察其過而議之也若其無過則亦不必議矣吏部職掌銓衡進退人才是其專職今用人一途旣已拘於例矣而當京察大典正宜激濁揚清如其止就自陳之詞以定去留誰則不能且令黠者開巧爲隱飾之端此本著發還另議具奏○

移駐甘肅平慶道於固原加兵備銜○改江南太湖營參將爲副將○己卯諭朕普免天下錢糧今歲係河南省輪免之年聞該省之開封歸德彰德懷慶河南南陽等府所屬有灘地官莊官地義田四項租課因非地丁正賦均不在蠲免之內但念民佃耕種徵租不得一體邀免未免向隅著加恩蠲免十分之三俾農佃均沾實惠○壬午諭前因山西萬泉安邑有聚眾抗官之案特差侍郎雅爾圖前往辦理今據奏報於中途患病不能前進又據巡撫愛必達奏稱萬泉縣刁民屯聚多人把守城門看此情形必有巨奸爲之謀主煽惑愚民逞兇肆惡猖獗至此非尋常聚眾可比著訥親乘驛前往給與欽差大臣關防同巡撫愛必達嚴行查辦以彰國法○諭軍機大臣等從前慶復奏稱班滾及伊家口並惡木勞丁姜錯太等一齊燒死等語甚屬可疑前已傳諭張廣泗令其於

到川時詳細訪查今鎮海營參將袁士林來京引見朕令大學士等詢問據稱泥日寨之姜錯太未曾燒死想姜錯太同在一處彼既未死其班滾似亦未曾燒死亦未可定等語袁士林雖係得之傳聞但伊親在行聞其焚燒泥日寨卽差伊前往舉火而爲此語顯屬有因可將此情節密行傳諭張廣泗令其將班滾姜錯太等果否燒死之處留心查訪此非張廣泗經辦之案自當無所瞻顧悉心查訪可以盡得實情卽行據實覆奏○丙戌諭向來州縣虧空倉庫定例綦嚴雍正年間復有分賠著賠之例所以懲戒通同掩飾蒙混徇庇之該管各上司令其實力稽查使屬員不致侵蝕此所以爲保全之善術也朕觀近年來虧空漸熾如奉天府霍備任內則有榮大成等五案山西則有劉廷詔之案朕是以照例令各該上司分賠而揆厥由來實緣該管上司見朕辦理諸事往往

從寬遂一以縱弛爲得體獨不思州縣定有養廉用度儘已寬裕何至侵那虧空今民間絲粟固不容妄取乃於帑項正供恣其婪取有是理乎且倉庫所入出自窮簷小民力作以奉公貪員安享以自利以赤子之脂膏飽僉壬之囊橐其情理深爲可惡而爲之長者一切置之不問迨至彌補無術則以揭參了事異日無可著追又爲之照例請豁是使貪員得計於目前國帑虛懸於事後而於其間上下相蒙彌縫巧飾實乃苟且因循廢法欺公之惡習益致參案纍纍成何政體在朕力崇寬大黷纘凝旒罔兼庶愼而諸臣秉節奉公整綱飭紀當查者查當參者參不事姑容不爲蒙蔽乃所爲主職要臣職詳合於寬而有制之正道若一味縱弛其將何所底止豈諸臣公爾忘私之義耶可傳諭各督撫共體此意痛除積習時時加意稽察據實辦理如仍前寬縱致貪風日熾帑項



侵虧無著惟該管上司是問○丁亥直隸水利工竣優敘高斌劉

於義及在事員弁有差○以楊嗣璟爲禮部右侍郎

由宗人府府丞遷

五月庚寅朔以德通爲左副都御史

由通政使遷

○辛卯召準泰來京

以策楞兼管廣東巡撫事○丙申諭向來鄉會試之年不準條陳

科場事務蓋欲使士子潛心誦讀不便紛更成例以擾其心志且

亦防弊之一端立法甚善夫三年之內何事不可言而必待場期

已近紛紛陳奏耶孫宗溥摺著交部暫存俟科場事畢另行議奏

嗣後如有似此違例條奏者必交部察議並傳諭科道等知之○

論國家賓興之典原以選拔俊髦若學殖荒陋者俱得廁名倖進

則玉石雜呈主司因而迷目自不可不嚴立限制前此學臣科試

之後復取遺才錄遺之後督撫又有大收其取送甚濫是以議有

科舉定額每舉人一名大省錄取八十名中省錄取六十名小省

錄取五十名其途本寬果係真才自不復有遺珠之歎但近來士子因科場剔除舊習頗知自愛有志讀書期以實應又當稍展其額以示鼓舞作興之意朕思前議但就正榜定額尙有副榜未經議及著再加恩每副榜一名大省加取四十名中省加取三十名小省加取二十名令各學政於考取遺才時不論生員貢監亦不拘縣分大小但就文理明通者照數錄送入場此外槩不許濫送○戊戌諭前因山西萬泉安邑刁民抗糧拒捕聚眾不法一案特遣侍郎雅爾圖前往查審辦理乃雅爾圖行至中途向巡撫愛必達告稱患病沉重不能前進請醫調治近又稱病勢漸愈緩緩回京向來八旗大臣官員均勵忘私忘家之義卽遇用兵行圍若未經派出無不痛哭懇求以從王事其或年老有疾亦情願捐軀於疆場而以偃息在牀死於婦人女子之手爲恥此滿洲之舊風雅

爾圖身爲大臣豈不知之至此案奉命查辦即使中途患病理應力疾前往果至不可支持巡撫便至攔阻而義在雅爾圖惟奮往已耳其不能審理案件請旨派人代己而已耳乃自稱病勢危篤逗遛不前究且此案查拏匪類則有綠旗之兵弁在定案參奏疏防則有巡撫以下不善經理之官員在何至耽延觀望畏首畏尾至於如此較之從前八旗公忠勇敢之風氣大相逕庭矣朕於是大爲人心風俗慮尙不爲雅爾圖一人而已也雅爾圖見旣患病著解任調理俟病痊之日自行奏聞請旨戶部侍郎著舒赫德調補○己亥諭軍機大臣等各省督撫養廉有一二萬兩者有僅數千兩者在督撫俱屬辦理公務而養廉多寡懸殊似屬未均著軍機大臣等酌量地方遠近事務繁簡用度多寡量爲裒益定議具奏尋議查各省督撫養廉銀見在湖廣總督一萬五千兩兩廣一

萬五千兩江蘇巡撫一萬二千兩江西浙江湖南湖北四川各一萬兩不甚懸殊無庸置議外直隸畿輔重地事務繁多總督養廉止一萬二千兩較各省覺少請增銀三千兩山東山西河南三省同屬近地事務用度亦屬相倣且俱係兼管提督而山東山西二省各二萬兩河南止一萬二千兩請將山東山西二省各減五千兩河南增三千兩各成一萬五千兩之數廣東巡撫一萬五千兩廣西止八千四百餘兩雖廣東用度稍多然相去太遠請將廣東減二千兩廣西增一千六百兩以足一萬兩之數川陝總督雖有節制邊方犒賞兵丁之費然養廉三萬兩較各省過多而西安甘肅二省巡撫西安居腹裏甘肅爲邊地乃西安二萬兩甘肅止一萬一千九百兩請將川陝總督減五千兩西安巡撫減八千兩甘肅巡撫增一百兩以足一萬二千兩之數閩浙總督其道里遠近

事務繁簡與兩廣相倣而養廉二萬一千兩未免過多請減三千兩福建巡撫養廉一萬二千兩未免不敷請增一千兩江蘇巡撫養廉一萬二千兩安徽則止八千兩雲南巡撫一萬五百五十兩貴州則止八千五百兩亦屬未均請將安徽增二千兩貴州增一千五百兩以足一萬兩之數至各省督撫養廉間有奇零乃從前據火耗之額定數今既經定制零數應刪請將兩江總督養廉銀一萬八千二百兩內去零銀二百兩雲貴總督雲南巡撫各去銀五百五十兩從之○庚子命左通政使張師載往直隸協理河務○壬寅命廣東巡撫所轄粵海關總督永遠兼管不必再交巡撫○以鄂容安爲兵部左侍郎署兵部右侍郎調蘊著爲兵部右侍郎由盛京戶部調○甲辰夏至祭地於方澤以望雨停設鹵簿○乙巳命刑部清理庶獄減徒以下罪○諭軍機大臣等據大學士慶復等

奏金川賊番圍攻各寨沃日土司求救隨調松茂協馬良桂帶兵一千五百名救援四月十二日抵熱龍寨解圍賊眾四散二十三日抵沃日官寨前駐沃防護之都司馬光祖等出迎等語摺內頭緒殊未明晰馬良桂以一副將領兵深入似屬奮勇但金酋兵勢方盛不無冒險是否另有官兵策應所報打死賊番名數憑何查驗其自熱龍至沃日何以但有營盤而蠻兵幾許如何逃散之處俱未敘明又前摺內稱都司馬光祖帶兵二百名駐沃防護今奏稱馬良桂兵到伊等方帶領土司出迎是否俱經被困官兵二百名有無損傷再前摺內稱宋宗璋駐兵雜谷腦其馬良桂進兵以後宋宗璋見駐何處作何調度又據另摺許應虎已經到川作何委用俱應一一詳晰奏聞再小金川向與大金川有隙其投順似係實心至綽斯甲等同惡相濟罪無可寬今見官兵勢盛乃稱情

願領兵出力報效此等反覆情形狡黠故智何足憑信前此瞻對四朗之案袁士弼一意招撫以致孽黨效尤豈可復蹈前轍不若盡行剿滅無俾易種既可鋤除兇惡以靖邊陲即可震懾諸蠻令革心向化不必專以招徠撫恤爲翦金酋羽翼之勝算也朕思此等苗蠻雖屬化外而叛服靡常端由辦理不善如但謂得其人不足臣得其地不足守比之禽獸虺蛇亦何妨聽其涵孕卵育並生宇宙之間而此等蜂屯蟻聚之眾果可度外置之乎卽如瞻對大金川之事亦豈好大喜功實因伊等聲勢日張不得不勞師動眾然前此進兵旣不能遽得要領臨事又惟草率了局官兵甫撤旋復煽動傷威損眾勞費實多若但來則應之去則弗追試思十至而十應何如以十應之勞用之於一舉毀穴焚巢芟除蕩滌之爲愈也稽之前事如漢之馬援諸葛亮蠻中至今懷其遺烈卽前明

韓雍王守仁輩亦能震以兵威羣蠻膽落坐收一勞永逸之利近日滇黔古州等境悉成樂土具有明效川省諸番亦當加意經營况我朝天威無遠弗屆卽蒙古四十八旗自古所不臣何嘗不在五服要荒之外而奉令守藩輸誠內嚮甯輯至今可見含齒戴髮之倫斷無不可化誨惟在德足綏懷威足臨制得柔遠之道耳可傳諭慶復張廣泗等悉心區畫因此番用兵將全蜀情形通盤計度如何可令蠻眾弭耳帖服永爲不侵不叛之臣使叢蘖密箐息警消烽共安至治熟籌長策詳悉奏聞辦理如果有不能辦理或不可辦理情節亦著將實在情形緣何不便之處密行陳奏○丁未諭爲國求賢者若渴之心以人事君者忘私之義朕於京察之年令自陳大臣各舉賢自代蓋以政務殷繁資人而理諸臣自當殫竭忠藎舉能其官以副朕顧俊之意乃乾隆九年諸臣所舉已



有不滿朕望者然尙猶可諉曰初今次所舉不但允協之未曾而  
夷考其中瞻顧黨同皆有所不免是不可以不諭如禮部侍郎楊  
嗣璟以廣西人而舉本省之學政官獻瑤不以官階越次爲嫌內  
閣學士朱定元而舉雲南知府徐鐸是皆藉口朕有韋布之士亦  
許舉薦之旨不知朕之此旨原以待出眾之材必猷爲特達者而  
後稱豈官獻瑤徐鐸輩即可舉以應明詔耶此等處若謂無私誰  
其信之又如盛京侍郎四人同在一城而所舉彼此相同顯係邪  
許會合並不出於誠也又如戶部侍郎李元亮甫薦湖北臬司徐  
琳而徐琳卽被總督塞楞額參奏以爲辦事乖張居心詐僞李元  
亮之保舉何所取耶又如廣西巡撫鄂昌薦舉布政使李錫秦上  
年託庸參劾唐綏祖原屬過刻經策楞審明朕將託庸革職因粵  
撫一時不得其人卽用鄂昌署理巡撫而李錫秦爲布政使適李

錫秦在京朕召見時伊痛貶託庸之劣而極稱鄂昌居官之優今  
鄂昌卽舉李錫秦以自代其何能免黨同朋比之嫌乎書曰舉能  
其官惟爾之能稱匪其人惟爾不任諸臣獨不聞之乎嗣自今諸  
臣其克勉進賢之誼勿苟且以塞責勿假公以濟私勿藏拙以廢  
公勿勉強以從事本省藩臬本省搢紳亦不許舉本省官員著爲  
例○復截漕糧十萬石於山東備賑○戊申諭乾隆十一年分直  
隸通省額徵地糧朕已普行蠲免其天津所屬有應徵葦漁課銀  
一項向來攤入地糧完納著加恩一體蠲除俾瀕海小民均沾惠  
澤○己酉 上詣 黑龍潭祈雨○辛亥愛必達解任調準泰爲  
山西巡撫以岳濬爲廣東巡撫由山東布政使遷○大學士公訥親奏萬  
安兩邑刁民見已訊供定案萬泉首犯張世祿始而歛錢告狀繼  
又主謀糾眾逼勒知府擬斬立決梟示張正惠等四名毆官索犯

放火把門安邑首犯張遠親寫傳單聚眾開闢李林水鳴鑼糾黨脅眾鬧城並擬斬立決餘犯各照律定擬至閩省官弁除巡撫愛必達總兵羅俊另摺題參外其蒲州府知府朱發萬泉縣知縣李廷棟庸懦貽誤釀成大釁都司胡璘河東道周紹儒奉調不前並請從重治罪安邑縣知縣佟濬平日縱容家丁衙役作弊致起釁端參革審竣從重議結得旨三法司覈議速奏所參官弁俱著革職拏交刑部治罪○壬子以赫德爲山東布政使李敏第爲山東按察使由江南淮徐道遷○癸丑諭朕宵旰幾思所以惠鮮懷保之道尤勵始勤終怠之戒不敢因臨蒞久而有泰心近歲以來科道官時有以民氣漸驕爲言者朕初不信仍戒飭之乃福建則有羅日光抗租拒捕之案山東則有張懷敬聚眾毆差之案江南則有王育英號召罷市之案廣東則有韋秀貞拒捕傷人之案而莫甚於

山西安邑萬泉聚眾抗官守門索犯之肆爲猖獗也夫以普免錢糧而民不以爲恩加恩厚恤而民不生其感懼或地方有司辦理少不如意輒呼羣咆哮挾制官長爲督撫者或避卞急之名或存省事之見不詢根由不顧大體甚或參處官員以團結案夫百姓敢於恣肆妄爲亦由平日不知尊親大義而平日之不知大義則由於朕厚加之以恩膏而不率先之以教化督撫亦惟知朕有愛民之心而不思朕有教民之責居恆煦嫗噢咻惟恐拂百姓之意百姓曰無官長意若官長去留可操之其手及羣不逞譁然而起而官長則已掛名彈章以致益煽習爲故常猶劣子之倚慈母有所恃而無恐且抗衡焉不思守令者朝廷之守令敬守令所以尊朝廷普免加賑格外之矜恤也假如不蠲免不接濟譬之父母不顧其子耳子不得生怨忿之心乃旣蠲旣賑而轉不安分守法耶

即使有司奉行不善胥吏夤緣爲奸國有常經民宜靜聽夫父母愛子亦其馴順者耳使其子縱欲而不能節之以禮爲非而不能裁之以義至於扞法抵禍議者必歸咎其父母其父母亦自悔過縱之失則今日之頑民聚眾干犯刑章朕得不引以爲己過深自愧悔也歟然朕雖失教於前尙思勤懇誨迪於後以爲眾黎庶勸各省督撫其倡率州縣諄切化導使愚民知敬畏官長服從教令勿復自蹈迷途以益朕過實厚望焉各省督撫其徧行曉諭使遠所窮鄉之民咸悉朕意

六月庚申朔諭朕幼誦簡編心儀先聖一言一動無不奉聖訓爲法程御極以來覺世牖民式型至道願學之切如見羹牆辟雍鐘鼓躬親殷薦而未登闕里之堂觀車服禮器心甚歉焉仰惟皇祖聖祖仁皇帝巡幸東魯親奠孔林盛典傳於奕禩皇

考世宗憲皇帝崇 聖加封重興廟貌嘗遣朕弟和親王恭代展

祀未以命朕意者其或有待歟朕寅紹丕基撫茲熙洽思以來年

孟春月東巡狩因溯洙泗陟杏壇瞻仰宮牆申景行之夙志復奉

聖母皇太后懿旨泰山靈嶽坤德資生近在魯邦宜崇報饗朕

不敢違爰遵 慈訓親奉 鑾輿秩于岱宗用答鴻貺旋蹕青齊

觀風布澤以昭崇 聖法 祖教孝省方鉅典所有應行典禮大

學士會同該部稽考舊章詳悉具儀以聞應豫備之各衙門查察

事宜先期請旨至行在一切所需悉出公帑毋得指稱供頓儲侍

絲毫貽累閭閻羽林衛士內府人役等各該管大臣嚴行稽查約

束並令扈蹕文武僚臣嚴飭儉從毋得侵踐田疇致妨宿麥如有

騷擾地方指名需索者立即參奏從重治罪通行曉諭知之○癸

亥諭十四叔允禩從前倚恃 皇考恩眷不遵 訓諭有違弟臣

之義是以 皇考將伊拘禁冀其悛改朕登極後特命釋放賜以  
公爵家居十數年來安靜循分並未生事則是自知悔悟能改前  
非矣使得及 皇考在御必當嘉予恩施朕用是仰承 皇考加  
恩之意著封十四叔允禩爲貝勒照常上朝○丙寅截漕糧二十  
萬石於天津備賑○以奉天缺雨禁商民海運米石○丁卯停新  
科舉人覆試○庚午命校刊通典通志文獻通考○辛未諭貴州  
苗蠻雜處軍務關係綦重巡撫文員與通省營弁不相統轄從前  
撫提各持意見公事遂致掣肘總督駐紮雲南相隔遼遠貴州巡  
撫著提督軍務節制通省兵馬○壬申以富德爲盛京戶部侍郎  
由副都統遷○甲戌諭馬端臨文獻通考一書綜貫歷代典章制度由  
上古以迄唐宋源委瞭然學者資以考鏡明王圻取遼金元明事  
蹟續之煩蕪寡要未足與三通並且至今又百五十餘年矣我朝

監古定制憲章明備是宜蒐擇討論以徵信從其自乾隆十年以前會典所載令甲所布金匱石室所儲與夫近代因革損益之異上溯宋嘉定以後馬氏所未備者悉著於編爲續文獻通考大學士張廷玉尙書梁詩正汪由敦經理其事惟簡惟要所有纂輯事宜酌議以聞○丙子慶復張廣泗奏小金川土司澤旺率眾投誠並退還搶占沃日三寨官兵進剿大金川攻毛牛及馬桑地方克之○戊寅移甘肅肅州回民分駐哈密